

**Inti Pati Hasil Kajian
Pengesanan Graduan
2011**

1.1 Profil Graduan 2011

- 1.1.1 Terdapat sebanyak 255 buah IPT dengan 236,453 graduan menyertai Kajian Pengesanan Graduan KPT bagi tahun 2011 berbanding 230 buah IPT dengan 224,776 graduan bagi tahun 2010.
- 1.1.2 Sebahagian besar graduan 2011 merupakan lulusan ijazah pertama mewakili sebanyak 42.9 peratus, diikuti oleh lulusan diploma (38.5 peratus), sijil (8.8 peratus), sarjana (7.1 peratus), Ph.D (0.8 peratus) dan peringkat lain (1.9 peratus).
- 1.1.3 Dari sudut bidang pengajian utama pula, majoriti (42.3 peratus) adalah graduan yang mengikuti jurusan sastera dan sains sosial, 27.2 peratus graduan jurusan teknik dan 14.1 peratus dalam jurusan sains.
- 1.1.4 Dari segi jantina, graduan lelaki mencatatkan peratusan yang lebih tinggi dalam bidang teknik (68.2 peratus) dan bidang teknologi maklumat dan komunikasi (51.6 peratus), manakala graduan perempuan pula lebih menjurus kepada bidang sains (74.0 peratus), pendidikan (70.4 peratus), dan sastera dan sains sosial (67.2 peratus).
- 1.1.5 Graduan antarabangsa mewakili 4.6 peratus daripada keseluruhan keluaran 2011 dengan IPTA mengeluarkan seramai 5,294 graduan antarabangsa (iaitu mewakili 4.5 peratus daripada keluarannya) dan IPTS pula melahirkan seramai 5,626 graduan, iaitu 7.6 peratus daripada keluarannya.

1.2 Status Pekerjaan Graduan (Warganegara) 2011

- 1.2.1 Secara keseluruhannya, sebanyak 52.6 peratus graduan memaklumkan status pekerjaan mereka sebagai bekerja semasa kajian dijalankan, 17.1 peratus melanjutkan pengajian, 4.9 peratus graduan sedang menunggu penempatan pekerjaan, 1.4 peratus sedang meningkatkan kemahiran, manakala selebihnya, iaitu 24.0 peratus, masih belum bekerja.
- 1.2.2 Status pekerjaan mengikut kategori IPT, graduan IPTS mencatatkan kadar bekerja paling tinggi, iaitu sebanyak 56.7 peratus, diikuti 51.6 peratus graduan IPTA, kolej komuniti (50.5 peratus), politeknik (49.5 peratus) dan IPT lain sebanyak 56.3 peratus.
- 1.2.3 Graduan peringkat pengajian Ph.D mencatatkan peratusan tertinggi bagi kategori graduan yang bekerja, iaitu 93.9 peratus, manakala graduan sarjana pula kedua tertinggi, iaitu sebanyak 82.3 peratus yang bekerja. Peratus graduan ijazah pertama, diploma dan sijil yang bekerja pula masing-masing adalah sebanyak 60.5 peratus, 40.2 peratus dan 41.1 peratus.

1.3 Maklumat Pekerjaan Graduan 2011

- 1.3.1 Sebanyak 47.4 peratus graduan yang bekerja menyatakan mereka bekerja dalam kumpulan profesional, diikuti 13.9 peratus dalam kumpulan pekerjaan juruteknik dan profesional berkaitan, pekerja perkeranian sokongan (13.8 peratus) dan pekerja perkhidmatan dan jualan (13.2 peratus).
- 1.3.2 Tinjauan pada peringkat pengajian mendapati 96.7 peratus graduan Ph.D, 81.7 peratus graduan sarjana dan 58.5 peratus graduan ijazah pertama bekerja dalam kumpulan profesional, manakala kebanyakan graduan diploma bekerja dalam kumpulan juruteknik dan profesional berkaitan (24.4 peratus) dan hanya 21.8 peratus bekerja dalam kumpulan profesional.

- 1.3.3 Dari segi taraf pekerjaan, sebanyak 57.7 peratus graduan mempunyai pekerjaan tetap, diikuti 19.2 peratus bekerja bertaraf kontrak, 19.8 peratus secara sementara dan 3.2 peratus lagi menyatakan mereka bekerja sendiri atau bekerja dengan keluarga.
- 1.3.4 Mengikut peringkat pengajian, graduan Ph.D dan sarjana merupakan kumpulan yang mempunyai peratusan tertinggi yang bekerja bertaraf tetap, iaitu masing-masing sebanyak 82.6 peratus dan 78.3 peratus, diikuti oleh graduan ijazah pertama (61.2 peratus) dan diploma (48.2 peratus).
- 1.3.5 Majoriti graduan 2011, iaitu 60.8 peratus, bekerja dalam sektor swasta (dengan swasta tempatan sebanyak 42.8 peratus dan swasta multinasional 18.0 peratus) dan sektor kerajaan sebanyak 21.0 peratus. Walau bagaimanapun, sektor kerajaan merupakan pembekal pekerjaan utama kepada graduan Ph.D dan sarjana, sementara sektor swasta tempatan merupakan pembekal pekerjaan utama kepada graduan peringkat ijazah pertama dan diploma.
- 1.3.6 Diperhatikan pendapatan bulanan graduan sangat bersandar kepada peringkat pengajian. Majoriti graduan Ph.D, iaitu sebanyak 60.7 peratus, berada dalam pendapatan bulanan RM5001 dan ke atas, manakala bagi graduan sarjana pula, kelompok terbesar (39.0 peratus) berpendapatan bulanan dalam selang RM3001-RM5000. Bagi graduan ijazah pertama pula, peratus tertinggi (22.1 peratus) berada dalam selang pendapatan bulanan RM1501-RM2000 dan kumpulan terbesar bagi graduan diploma berada dalam kumpulan pendapatan RM1000 dan ke bawah, iaitu sebanyak 41.3 peratus.
- 1.3.7 Pekerjaan graduan 2011 mengikut sektor ekonomi menunjukkan 74.1 peratus graduan Ph.D, 46.0 peratus graduan sarjana dan 19.3 peratus graduan ijazah pertama bekerja dalam sektor pendidikan. Peratus terbesar, iaitu 12.0 peratus, graduan diploma bekerja dalam sektor ekonomi pembuatan.

1.4 Graduan 2011 yang Melanjutkan Pengajian

- 1.4.1 Secara keseluruhan, sebanyak 24.9 peratus graduan 2011 melanjutkan pengajian sejurus selepas tamat pengajian mereka. Dalam kalangan yang melanjutkan pengajian, 55.3 peratus melanjutkan pengajian ke peringkat ijazah pertama, 16.7 peratus ke peringkat sarjana, diploma (11.7 peratus), Ph.D (6.0 peratus) dan peringkat lain (10.2 peratus).
- 1.4.2 Majoriti graduan IPTA, iaitu sebanyak 92.2 peratus, memilih semula IPTA bagi melanjutkan pengajian mereka, sebanyak 59.7 peratus graduan IPTS melanjutkan pengajian di IPTS semula. Manakala kebanyakan (iaitu 63.8 peratus) graduan kolej komuniti pula memilih politeknik sebagai destinasi untuk melanjutkan pengajian. Bagi graduan politeknik pula, 49.4 peratus memilih IPTA bagi melanjutkan pengajian dan 44.1 peratus memilih semula politeknik.
- 1.4.3 Kebanyakan graduan, iaitu sebanyak 86.0 peratus, melanjutkan pengajian dalam bidang yang sama dengan bidang pengajian sebelumnya, manakala selebihnya, iaitu 14.0 peratus, memilih bidang pengajian yang berbeza daripada sebelumnya.
- 1.4.4 Antara tujuan utama graduan 2011 melanjutkan pengajian adalah untuk meningkatkan tahap kelayakan akademik mereka, iaitu sebanyak 33.3 peratus yang menyatakan demikian, diikuti oleh minat mendalam mencari ilmu (24.5 peratus) dan mencari prospek kerjaya yang lebih baik (23.6 peratus).

1.5 Maklumat Graduan (Warganegara) 2011 yang Belum Bekerja

- 1.5.1 Sebanyak 24.0 peratus responden 2011 menyatakan status pekerjaan mereka sebagai belum bekerja semasa kaji selidik dijalankan. Daripada jumlah ini, 69.5 peratus menyatakan mereka sedang mencari pekerjaan, 12.2 peratus pula sedang menunggu penempatan bagi melanjutkan pengajian dan sebanyak 4.6 peratus memilih untuk berehat buat sementara waktu. Di samping itu, terdapat juga sebanyak 3.6 peratus yang tidak bekerja kerana memenuhi tanggungjawab terhadap keluarga, 3.0 peratus menyatakan tawaran kerja yang telah diterima tidak sesuai dan 7.1 peratus lagi memberi pelbagai alasan lain.
- 1.5.2 Status pekerjaan mengikut peringkat pengajian, graduan peringkat sijil mempunyai peratusan yang paling tinggi belum bekerja, iaitu sebanyak 29.6 peratus, 5.6 peratus melebihi kadar belum bekerja bagi keseluruhan graduan. Mengikut bidang pengajian utama pula, didapati graduan lulusan bidang sains mempunyai peratusan paling tinggi yang belum bekerja, iaitu 29.5 peratus.
- 1.5.3 Majoriti graduan belum bekerja, iaitu 69.3 peratus, menyatakan pendapatan keluarga mereka kurang daripada RM2000 sebulan.
- 1.5.4 Dalam kalangan yang belum sebulan bekerja, didapati sebanyak 39.2 peratus graduan menyatakan mereka tidak pernah menghadiri mana-mana temu duga pekerjaan dan 55.6 peratus graduan pula pernah menghadiri temu duga sebanyak 1 – 5 kali.